

四庫全書

集部

欽定四庫全書

古今詩刪卷八

明 李攀龍 編

宋詩

直東宮答鄭尚書

顏延之

皇居體環極設險祇天工兩闌阻通軌對禁限清風跂
予旅東館徒歌屬南墉寢興鬱無已起觀辰漢中流雲
謁青闕皓月鑒丹宮踟躕清防密徙倚悼漏窮君子吐

芳訊感物惻余衷惜無丘園秀景行彼高松知言有誠
實美價難克充何以銘嘉貺言樹絲與桐

車駕幸京口侍遊蒜山作

顏延之

元天高壯列日觀臨東溟入河起陽峽踐華因削成巖
險去漢宇襟衛徙吳京流池自化造山關固神營園縣
極方望邑社總地靈宅道炳星緯誕曜應辰明睿思經
故里巡駕帟舊垌陟峰騰輦路尋雲抗瑤甍春江壯風
濤闌野茂萸英宣遊弘下濟窮遠凝聖情嶽濱有和會

祥習在卜征周南悲昔老留滯感遺氓空食疲廊肆反
稅事巖耕

始安郡還都與張湘州登巴陵城樓作

顏延之

江漢分楚望衡巫奠南服三湘淪洞庭七澤鵠荆牧經
塗延舊軌登闔訪川陸水國周地險河山信重複却倚
雲夢林前瞻京臺圓清雰霽岳陽曾暉薄澗澳悽笑自
遠風傷哉千里目萬古陳往還百代勞起伏存沒竟何
人炯介在明淑請從上世人歸來藝桑竹

五君詠二首

顏延之

阮步兵

阮公雖淪跡識密鑒亦洞沉醉似埋照寓辭類託諷長
嘯若懷人越禮自驚衆物故不可論途窮能無慟

嵇中散

中散不偶世本自餐霞人形解驗默仙吐論知凝神立
俗迂流議尋山治隱淪鸞翮有時鍛龍性誰能馴

北宅祕園

謝莊

夕天霽晚氣輕霞澄暮陰微風清幽幌餘日照青林收
光漸窻歇窮園自荒深綠池翻素景秋槐響寒音伊人
儻同愛絃酒共棲尋

述祖德詩二首

謝靈運

達人貴自我高情屬天雲兼抱濟物性而不纓垢氛以
生蕃魏國展季救魯人弦高犒晉師仲連卻秦軍臨組
乍不縲對珪寧肯分惠物辭所賞勵志故絕人若若歷
千載遙遙播清塵清塵竟誰嗣明哲垂經綸委講綴道

論改服康世屯屯難既云康尊主隆斯民

其二

中原昔喪亂喪亂宣解已崩騰永嘉末逼迫太元始河
外無反正江介有蹠圯萬邦咸震懾橫流賴君子拯溺
由道情龕暴資神理秦趙欣來蘇燕魏遲文軻賢相謝
世運遠圖因事止高揖七州外拂衣五湖裏隨山疏濬
潭傷巖藝枌梓遺情捨塵物貞觀丘壑美

從遊京口北固應詔

謝靈運

玉璽戒誠信黃屋示崇高事為名教用道以神理超昔
聞汾水游今見塵外鑣鳴笳發春渚稅鑾登山椒張組
眺倒景列筵矚歸潮遠巖映蘭薄白日麗江皋原隰萋
綠柳墟圉散紅桃皇心美陽澤萬象咸光昭顧已枉維
繫撫志慙場苗工拙各所宜終以反林巢曾是榮舊想
覽物奏長謠

鄰里相送至方山

謝靈運

祇役出皇邑相期憩甌越解纜及流潮懷舊不能發析

金定巳月全書
卷八
析就衰林皎皎明秋月含情易為盈遇物難可歇積疴
謝生慮寡欲罕所闕資此永幽棲宜伊年歲別各勉日
新志音塵慰寂蔑

過始寧墅

謝靈運

東髮懷耿介逐物遂推遷違志似如昨二紀及茲年緇
磷謝清曠疲薊慙貞堅拙疾相倚薄還得靜者便剖竹
守滄海枉帆過舊山山行窮登頻水涉盡洄泐巖峭嶺
稠疊洲縈渚連綿白雲抱幽石綠篠媚清漣葺宇臨廻

江築觀基曾巔揮手告鄉曲三載期歸旋且為樹枌櫨
無令孤願言

晚出西射堂

謝靈運

步出西城門遙望城西岑連障疊巘崿青翠杳深沉
曉霜楓葉丹夕曛嵐氣陰節往感不淺感來念已深
羈雌戀舊侶迷鳥懷故林含情尚勞愛如何離賞心
撫鏡華緇鬢攬帶緩促衿安排徒空言幽獨賴鳴琴

登池上樓

謝靈運

金少隱先生集 卷八
潛虬媚幽姿飛鴻響遠音薄霄愧雲浮棲川忤淵沈進
德智所拙退耕力不任狗祿反窮海卧疴對空林衾枕
昧節候褰開暫窺臨傾耳聆波瀾舉目眺嶮嶽初景革
緒風新陽改故陰池塘生春草園柳變鳴禽祁祁傷幽
歌萋萋感楚吟索居易永久離羣難處心持操宜獨古
無悶徵在今

齋中讀書

謝靈運

昔余遊京華未嘗廢丘壑矧乃歸山川心迹雙寂莫虛

館絕諍訟空庭來鳥雀卧疾豐暇豫翰墨時閒作懷抱
觀古今寢食展戲謔既笑沮溺苦又哂子雲閣執戟亦
以疲耕稼豈云樂萬事難並歡達生幸可託

初去郡

謝靈運

彭薛裁知耻貢公未遺榮或可優貪競豈足稱達生伊
予秉微尚拙訥謝浮名廬園當棲巖卑位代躬耕顧已
雖自許心迹猶未并無庸方周任有疾像長卿畢娶類
尚子薄遊似邴生恭承古人意促裝返柴荆牽絲及元

興解龜在景平負心二十載於今廢將迎理棹遄還期
遵渚鶩脩坳遡溪終水涉登嶺始山行野曠沙岸淨天
高秋月明憇石挹飛泉攀林蹇落英戰勝臞者肥鑒止
流歸停即是羲唐化獲我擊壤情

田南樹園激流植援

謝靈運

樵隱俱在山由來事不同不同非一事養痾亦園中
園屏氛雜清曠招遠風卜室倚北阜啟扉面南江激澗
代汲井插槿當列墉羣木既羅戶衆山亦當窓靡迤趨

下田迢遞瞰高峯，寡欲不期勞。即事罕人功，唯開蔣生
徑。永懷求羊蹤，賞心不可忘。妙善冀能同。

石壁精舍還湖中作

謝靈運

昏旦變氣候，山水含清暉。清暉能娛人，游子澹忘歸。出
谷日尚早，入舟陽已微。林壑斂暝色，雲霞收夕霏。芰荷
迭映蔚，蒲稗相因依。披拂趨南逕，愉快偃東扉。慮澹物
自輕，意愜理無違。寄言攝生客，試用此道推。

石門新營所住四面高山迴溪石瀨茂林脩竹

謝靈運

躋險築幽居披雲卧石門苔滑誰能步葛弱豈可捫
弱秋風過萋萋春草繁美人遊不還佳期何由敷芳塵
凝瑶席清醕滿金罇洞庭空波瀾桂枝徒攀翻結念屬
霄漢孤景莫與諛俯濯石下潭仰看條上猿早聞夕飈
急晚見朝日暎崖傾光難留林深響易奔感往慮有復
理來情無存庶持乘日車得以慰營魂匪為衆人說冀
與智者論

初發石首城

謝靈運

白珪尚可磨斯言易為緇雖抱中孚爻猶勞貝錦詩寸
心若不亮微命察如絲日月垂光景成貸遂兼茲出宿
薄京畿晨裝搏會颶重經平生別再與朋知辭故山日
已遠風波豈還時迢迢萬里帆茫茫終何之遊當羅浮
行息必廬霍期越海陵三山遊湘歷九嶷欽聖若旦暮
懷賢亦懷其皎皎明發心不為歲寒欺

東陽溪中贈荅二首

謝靈運

可憐誰家婦緣流灑素足明月在雲間迢迢不可得

其二

可憐誰家郎緣流乘素舸但問情若為月就雲中墮

登江中孤嶼

謝靈運

江南倦歷覽江北曠周旋懷新道轉迫尋異景不延亂
流趨正絕孤嶼媚中川雲日相輝映空水共澄鮮表靈
物莫賞蘊真誰為傳想像崑山姿緬邈區中緣始信安
期術得盡養生年

秋懷

謝惠連

平生無志意，少小嬰憂患。如何乘苦心，矧復值秋晏。皎皎天月明，奕奕河宿爛。蕭瑟含風蟬，寥唳度雲鴈。寒商動清閨，孤燈暖幽幔。耿介繁慮積，展轉長宵半。夷險難預謀，倚伏昧前算。雖好相如達，不同長卿慢。頗悅鄭生偃，無取白衣宦。未知古人心，且從性所翫。賓至可命觴，朋來當染翰。高臺驟登踐，清淺時陵亂。頽魄不再圓，傾羲無兩旦。金石終銷毀，丹青暫彫煥。各勉玄髮歡，無

金少府集卷八
貽白首嘆因歌遂成賦聊用布親串

泛湖歸出樓中望月

謝惠連

日落泛澄瀛星羅遊輕橈憇榭面曲汜臨流對迴潮
輟策共駢筵並坐相招要哀鴻鳴沙渚悲猿響山椒
亭亭映江月颼颼出谷飈斐斐氣冪岫泫泫露盈條
近矚祛幽蘊遠視盪諠囂晤言不知罷從夕至清朝

從登香鑪峯

鮑照

辭宗盛荆夢登歌美鳧繹徒收杞梓饒曾非羽人宅羅

景鵲雲扃沾光扈龍策御風親列涂乘山窮禹迹含嘯
對霧岑延蘿倚峯壁青冥搖煙樹穹跨負天石霜崖滅
土膏金澗測泉脉旋淵抱星漢乳竇通海碧谷館駕鴻
人巖棲咀丹客殊物藏珍怪竒心隱仙籍高世伏音華
綿古遁精魄蕭瑟生哀聽參差遠驚覲慙無獻賦才沈
汙奉毫帛

贈故人馬子喬六首

鮑照

躑躅城上羊攀偶食玄草俱共日月輝昏明獨何早夕

風飄野籜飛塵被長道親愛難重陳懷憂坐空老

其二

寒灰滅更然夕華晨更鮮春冰雖暫解冬水復還堅佳
人捨我去賞愛長絕緣歡至不留日感物輒傷年

其三

松生隴坂上百尺下無枝東南望河尾西北隱崑崖野
風振山籜朋鳥夜驚離悲涼貫年節葱翠恒若斯安得
草木心不怨寒暑移

其四

種橘南池上種杏北池中池北既少露池南又多風早
寒逼晚歲衰恨滿秋容湘濱有靈鳥其字曰鳴鴻一梔
繒繳痛長別遠無雙

其五

皎如川上鵠赫似握中丹宿心誰不欺明白古所難憑
楹觀皓露灑酒盪憂顏永念平生意窮光不忍還淹留
徒攀桂延佇空結蘭

其六

雙劍將離別，先在匣中鳴。
煙雨交將夕，從此遂分形。
雌沈吳江裏，雄飛入楚城。
吳江深無底，楚關有崇扃。
一為天地別，豈直限幽明。
神物終不隔，千祀儻還并。

和王丞

鮑照

限生歸有窮，長意無已年。
秋心日迫絕，春思坐連綿。
銜協曠古願，斟酌高代賢。
遊迹俱浮海，採藥共還山。
夜聽橫石波，朝望宿巖煙。
明澗子公越，飛蘿予縈牽。
性好必

齊遂迹幽非妄傳滅志身世表藏名琴酒間

上尋陽還都道中作

鮑照

昨夜宿南陵今旦入蘆洲客行惜日月崩波不可留侵
星赴早路畢景逐前儔鱗鱗夕雲起獵獵晚風遒騰沙
鬱黃霧翻浪揚白鷗登艫眺淮甸掩泣望荆流絕目盡
平原時見遠煙浮倏忽坐還合俄思甚兼秋未嘗違戶
庭安能千里遊誰令乏古節貽此越鄉憂

還都至三山望石頭城

鮑照

泉源安首流川末澄遠波晨光被水族曉氣歇林阿兩
江皎平迥三山鬱駢羅南帆望越嶠北榜指齊河關扁
繞天邑襟帶抱尊華長城非壑嶮峻岵似荆茅攢樓貫
白日摘堞隱丹霞征夫喜觀國遊子遲見家流連入京
引躑躅望鄉歌彌前歎景促逾近勸路多偕萃猶如茲
弘易將謂何

詠史

鮑照

五都矜財雄三川養聲利百金不市死明經有高位京

城十二衢飛甍各鱗次仕子彩華纓遊客竦輕轡明星
晨未晞軒蓋已雲至賓御紛颯沓鞍馬光照地寒暑在
一時繁華及春媚君平獨寂寞身世兩相棄

行藥至城東橋

鮑照

鷄鳴關吏起伐鼓早通晨嚴車臨迥陌延瞰歷城閭蔓
草緣高隅修楊夾廣津迅風首旦發平路塞飛塵擾擾
遊宦子營營市井人懷金近從利撫劍遠辭親爭先萬
里塗各事百年身開芳及稚節含綵吝驚春尊賢永照灼

孤賤長隱淪容華坐銷歇端為誰苦辛

園中秋散

鮑照

負疾固無豫晨衿悵已單氣交蓬門疎風數園草殘荒
墟半晚色幽庭憐夕寒既悲月戶清復切夜蟲酸流枕
商聲苦騷殺年志闌臨歌不知調發興誰與歡儻結絃
上情豈孤林下彈

觀圃人藝植

鮑照

善賈笑蠶漁巧宦賤農牧遠養遍關市深利窮海陸乘

軺實金羈當壚信珠服居無逸身伎安得坐梁肉徒承
屬生幸政緩吏平陸春畦及耘藝秋場早芟築澤閔既
繁高山營又登熟抱鍾瓏上餐結茅野中宿空識已尚
淳寧知俗翻覆

遇銅山掘黃精

鮑照

土肪閔中經水芝韜內策實餌緩童年命藥駐衰歷矧
蓄終古情重拾煙霧迹羊角棲斷雲榼口流隘石銅溪
畫森沈乳竇夜涓滴既類風門磴復像天井壁蹠蹠寒

葉離濃濃秋水積松色隨野深月露依草白空守江海
思宜愧梁鄭客得仁古無怨順道今何惜

樂遊應詔詩

范曄

崇盛歸朝闕虛寂在川岑山梁協孔性黃屋非堯心軒
駕時未肅文囿降照臨流雲起行蓋晨風引鑾音原薄
信平蔚臺澗備曾深蘭池清夏氣修帳含秋陰遵渚攀
蒙密隨山上嶮嶽睇目有極覽遊情無近尋聞道雖已
積年力互頽侵探已謝丹黻感事懷長林

效子建白馬篇

袁淑

劍騎何翩翩長安五陵間秦地天下樞八方湊才賢荆
魏多壯士宛洛富少年意氣深自負肯事郡邑權藉藉
關外來車徒傾國鄜五侯競書幣羣公亟為言義分明
於霜信行直如弦交歡池陽下留宴汾陰西一朝許人
諾何能坐相捐影節去函谷投佩出甘泉嗟此務遠圖
心為四海懸但營身意遂豈校耳目前俠烈良有聞古
來共知然

答顏延年

王僧達

長卿冠華陽仲連擅海陰珪璋既文府精理亦道心君
子聳高駕塵軌實為林崇情符遠迹清氣溢素襟結遊
略年義篤顧棄浮沉寒榮共偃曝春醞時獻斟聿來歲
序暄輕雲出東岑麥壟多秀色楊園流好音歡此乘日
暇忽忘逝景侵幽衷何用慰翰墨久謠吟棲鳳難為條
淑貺非所臨誦以永周旋匣以代兼金

和瑯琊王依古

王僧達

少年好馳俠旅宦遊關源既踐終古跡聊訊興亡言隆
周為藪澤皇漢成山樊久沒離宮地安識壽陵園仲秋
邊風起孤蓬卷霜根白日無精景黃沙千里昏顯軌莫
殊轍幽塗豈異魂聖賢良已矣抱命復何怨

贈范曄詩

陸凱

折花逢驛使寄與隴頭人江南無所有聊贈一枝春

齊詩

栖玄寺聽講畢遊卽園七韻應司徒教

王融

金匱要略卷八
道勝業茲遠心閒地能隙桂棹鬱初栽蘭墀坦將闢虛
檐對長嶼高軒臨廣液芳草列成行嘉樹紛如積流風
轉還逕清煙泛喬石日汨山照紅松映水華碧暢哉人
外賞遲遲眷西夕

遊仙詩

王融

湘沅有蘭芷汨吾欲南征遺珮出長浦舉袂望增城朱
霞拂綺樹白雲照金楹五芝多秀色八桂常冬榮弭節
且夷與參差聞鳳笙

淨行詩十首

王融

冥津殊復曉高聽亦能卑
陰墻雖兩密幽夜有四知
炎山翻烈火冰澗布寒澌
羅城振雲幕鋒樹鬱霜枝
茹荼非云苦集木豈稱危
求仁曾已得長歎欲何為

其二

韞石諒非真飾瓶信為假
竊眼皋門上濫吹溜軒下
鳳祀徒驚心騶文終好野
實相豈或照浮榮未能捨
迹殊冠冕客事襲驅馳者
已矣歌鄭聲無然亂周雅

其三

處塵貴不染被褐重懷珠美玉曜幽石曾蘭挺叢芻四
氏不為侶三界豈能渝諒茲親愛染寧以財利拘煩流
捨智寶榛路坦夷途萬物竟何匹烈火樹紅笑

其四

心怨動紛遶情怡輒遷互歡愛一離遠傷憂坐衰暮連
幌結清陰高臺起風露腐毒緣芳旨天伐實修誇慾網
必虧生繁置或全免眇眇夜何期悠悠終肯悟

其五

端襟測煩海矯步寫埃氛三受猶絕雨八苦若浮雲輸
心仰圓極罄質委方墳朝遊淨國侶暮集靈山羣燈祇
開遠照香宇薦嘉薰俛首睇入俗信矣靜為君

其六

生塗非一理識緒固饒津徒駭東陵富空嗟北郭貧國
生曾已戾顏氏信為仁逢尤昭往業習善會茲身勤憂
永夷泰晏安終苦辛令名且云重豈若樹良因

其七

神膏施唯重玄酒恩未隆明璣隋水上潤玉藍田中稟
天性所極資敬道攸崇羽毛共以勢輪軌相為通報愴
前雅酌言愛餘風遵塗每多舛顧省能無忤

其八

冬狐狸豐毳春蠶緒輕絲形骸翻為阻心識還自欺華
榮羈中日生平少年時驅車追俠客酌酒弄妖姬但念
目前好安知身後悲惕然一以愧永與情愛辭

其九

蘭室改蓬心旃崖變伊草丹青有必渝絲礫豈常皓曲
棘且繩直詭木遂彫藻一簣或成山百里倦中道隆漢
乃王臣失楚信元保勉矣德不孤至言匪虛造

其十

金山嚴寶仞瓊琬列瑤蕙墻狐議不窟檐鷗豈能栖淨
花莊思序慧沼盟身倪六羣儻未一七衆固恒齊端儀
有直景正道無傾蹊維宮超以悟襄野竟何迷

遊山

謝朓

託養因支離乘閒遂疲蹇語默良未尋得喪云誰辯幸蒞
山水都復值清冬緬凌厓必千仞尋谿將萬轉豎蹻既峻
增迴流復宛澶杳杳雲竇深淵淵石溜淺傷眺鬱鬱繁
還望森枏梗荒隩被歲莎崩壁帶苔蘚鼯狖叫層嵒鷗
鳬戲沙衍觸賞聊自觀即趣咸已展經目惜所過前路
欣方踐無言蕙草歇留垣芳可搴尚子時未歸邴生思
自免永志昔所欽勝迹今能選寄言賞心客得性良為善

酬王晉安

謝朓

稍稍枝早勁，塗塗露晚晞。
南中榮橘柚，寧知鴻鴈飛。
拂露朝青閣，日暎坐彤闥。
悵望一途阻，參差百慮依。
春草秋更綠，公子未西歸。
誰能久京洛，緇塵染素衣。

暫使下都夜發新林至京邑贈西府同僚

謝朓

大江流日夜，客心悲未央。
徒念關山近，終知返路長。
秋河曙耿耿，寒渚夜蒼蒼。
引領見京室，宮雉正相望。
金波麗鵝鵲，玉繩低建章。
驅車鼎門外，思見昭丘陽。
馳暉不

可接何況隔兩鄉風雲有鳥路江漢限無梁常恐鷹隼擊時菊委嚴霜寄言罽羅者寥廓已高翔

郡內高齋閒望答呂法曹

謝朓

結構何迢遞曠望極高深窓中列遠岫庭際俯喬林日出衆鳥散山暝孤猿吟已有池上酌復此風中琴非君美無度孰為勞寸心惠而能好我問以瑤華音若遺金門步見就玉山岑

在郡卧病呈沈尚書

謝朓

淮楊股肱守高卧猶在茲
況復南山曲何異幽棲時
連陰盛農節藎笠聚東菑
高閣常晝掩荒堦少諍辭
珍簞清夏室輕扇動涼颼
嘉魴聊可薦綠蟻方獨持
夏李沈朱實秋藕折輕絲
良辰竟何許夙昔夢佳期
坐嘯徒可積為邦歲已朞
絃歌終莫取撫機令自嗤

新亭渚別范零陵雲

謝朓

洞庭張樂地瀟湘帝子遊
雲去蒼梧野水還江漢流
停驂我悵望輟棹子夷猶
廣平聽方籍茂陵將見求
心事

俱已矣江上徒離憂

之宣城郡出新林浦向板橋

謝朓

江路西南永歸流東北鶩天際識歸舟雲中辯江樹旅
思倦搖搖孤遊昔已屢既懼懷祿情復協滄洲趣蠶塵
自茲隔賞心於此遇雖無玄豹姿終隱南山霧

休沐重還丹陽道中

謝朓

薄遊第從告思閒願罷歸還叩歌賦似休汝車騎非灞
池不可別伊川難重違汀葭稍靡靡江蘼復依依田鵠

遠相呌沙鴟忽爭飛雲端楚山見林表吳岫微試與征
徒望鄉淚盡沾衣賴此盈樽酌含景望芳菲問我勞何
事霜木仰清徽志狹輕軒冕恩甚戀閨闈歲華春有酒
初服偃郊扉

晚登三山還望京邑

謝朓

灞涘望長安河陽視京縣白日麗飛甍參差可見餘
霞散成綺澄江靜如練喧鳥覆春洲雜英滿芳甸去矣
方滯淫懷哉罷歡宴佳期悵何許淚下如流霰有情知

望鄉誰能鬢不變

直中書省

謝朓

紫殿肅陰陰彤庭赫弘敞風動萬年枝日華承露掌玲瓏結綺錢深沈映朱網紅藥當階翻蒼苔依砌上茲言翔鳳池鳴珮多清響信美非吾室中園思偃仰朋情以鬱陶春物方駘蕩安得凌風翰聊恣山泉賞

宣城郡內登望

謝朓

借問下車日匪直望舒圓寒城一以眺平楚正蒼然山

積陵陽阻溪流春穀泉威紆距遙甸巉岫帶遠天切切
陰風暮桑柘起寒煙悵望心已極惆悵魂屢遷結髮倦
為旅平生早事邊誰規鼎食盛寧要狐白鮮方棄汝南
諾言稅遠東田

冬日晚郡事隙

謝朓

安牘時閒暇偶坐觀卉木颯颯滿池荷脩脩陰窻竹簷
隙自周流房櫳閑且肅蒼翠望寒山崢嶸瞰平陸已惕
慕歸心復傷千里目風霜旦夕甚蕙草無芬馥云誰美

笙簧孰是厭適軸願言稅逸駕臨潭餌秋菊

和劉西曹望海臺

謝朓

滄波不可望望極與天平往往孤山映處處春雲生
池遠鴈沒颯沓羣鳬驚器塵及簿領棄捨出重城臨川
徒可羨結網庶時營

和王著作作融八公山

謝朓

二別阻漢坻雙峭望河澳茲嶺復嶠岿分區奠淮服東
限琅瑯臺西距孟諸陸阡眠起雜樹檀藥蔭修竹日隱

澗疑空雲聚岫如複出沒眺樓雉遠近送春日戎州昔
亂華素景淪伊穀阨危賴宗袞微管寄明牧長蛇固能
剪奔鯨自此曝道峻芳塵流紫遙年運脩平生仰令圖
吁嗟命不淑浩蕩別親知連翩戒征軸再遠館娃宮兩
去河陽谷風煙四時犯霜雨朝夜沐春秀良已凋秋場
庶能築

和伏武昌登孫權故城

謝朓

炎靈遺劒璽當塗駭龍戰聖期缺中壤霸功興寓縣鵲

起登吳山鳳翔凌楚甸衿帶窮巖險帷帟盡謀選北拒
溺膠鑣西龕收組練江海既無波俯仰流英眇裘冕類
裡郊卜揆崇離殿釣臺臨講閣樊山開廣讌文物共歲
華聲明且葱蒨三光厭分景書軌欲同薦參差世紀忽
寂寞市朝變舞館識餘基歌梁想遺囀故林衰木平荒
池秋草徧雄圖悵若茲茂宰深遐睠幽客滯江臯從賞
垂纓弁清卮阻獻酬良書限聞見幸藉芳音多承風采
餘絢于役倘有期鄂渚同遊衍

和徐都曹出新亭渚

謝朓

宛洛佳遊遊春色滿皇州結軫青郊路迴瞰蒼江流日
華川上動風光草際浮桃李成蹊徑桑榆陰道周東都
已俶載言歸望綠疇

奉和隨王殿下十六首

謝朓

高秋夜方靜神居肅且深閒階塗廣路涼宇澄月陰嬋
娟影池竹踈蕪散風林淵情協爽節詠言興德音閣道
空已積千直愧蓬心

其二

星回夜未艾洞房凝遠情雲陰滿池榭中月懸高城喬
木含風霧行鴈飛且鳴平臺盛文雅西園富羣英芳慶
良永矣君王嗣德聲眷此伊洛詠載懷汾水情顧已非
麗則恭惠奉仁明觀淄詠已失憮然愧簪纓

其三

神心遺魏闕中想顧汾陽肅景懷辰豫捐玦翦山楊時
惟清夏始雲景暖含芳月陰洞野色日華麗池光草合

亭臯遠霞生川路長端坐聞鶴引靜瑟愴復傷懷哉泉
石思歌詠鬱瓊相春塘多迭駕言從伊與商衮職眷英
覽獨善伊何忘願輟東都遠弘道侍濠梁

其四

睿心重離析歧路清江隈四面寒飈舉千里白雲來川
長別管思地迥翻旗回還顧昭陽闕超遠章華臺置酒
巫山日為君停玉杯

其五

桂樓飛絕限超遠向江岐輕雲霽廣甸微風散清漪連
連絕鴈舉渺渺青煙移嚴城亂芸草霜塘凋素枝氣爽
深遙矚豫水聊停曦卽已終可悅盈尊且若斯

其六

念深冲照廣業闡清化玄端儀穆金殿宣教藻瓊筵船
湛輕惟藹聲轉芳風旋眷轡栖道樹方津棹法舫歸興
憑大造昭塗良易筌

其七

玄冬寂脩夜天園靜且開亭皋霜氣愴松宇清風來高
琴時以思幽人多感懷幸藉汾陽想嶺首正徘徊

其八

愴愴緒風興祁祁族雲布嚴氣集高軒稠陰結寒樹日
月謬論思朝夕承清豫徒藉小山文空揖章臺賦

其九

肅景遊清都脩簪待蘭室累榭疎遠風廣庭麗朝日穆
穆神儀靜惜惜道言密一食繫靈表無吝科年厯

其十

清房洞已靜閒風伊夜來雲生樹陰遠軒廣月容開宴
私移燭飲遊覺藉琴臺風猷冠溜鄴祗烏愧唐枚

其十一

方池含積水明月流皎鏡規荷承日泣影鱗與風泳上
善叶淵心止川惻動性幸是方春來側默游濠盛

其十二

浮雲西北起飛來下高堂合散輕帷表飄舞桂臺陽遙

階收委羽平地如夜光眷言金玉照顧慚蘭蕙芳

其十三

炎光缺風雅宗霸極時淪龍德待雲霧今圖方再晨歲
遠荒城思霜華宿草陳英威遽如是徘徊岐路人

其十四

分悲玉瑟斷別緒金樽傾風入芳帷散缸華蘭殿明想
折中園草共知千里情行雲故鄉色贈此一離聲

其十五

年華豫已滌夜艾賞方融
新萍時合水弱草未勝風
閨幽瑟易響臺迴月難中
春物廣餘照蘭萱佩未窮

其卅六

連漪映餘雪嚴城限深霧
清寒起洞門東風急池樹
神居望已肅徘徊舉冲趣
栖歸如歸詠丘山不可屢

古今詩刪卷八

欽定四庫全書

集部

古今詩刪卷九

十

詳校官中書_臣李采

侍讀_臣孫球覆勘

總校官庶吉士_臣倉聖脈

校對官編修_臣盧燧

謄錄舉人_臣郭文鏐

欽定四庫全書

古今詩刪卷九

明 李攀龍 編

梁詩

登城 簡文帝

日影半東簷靜念空村
小堂倦縹書華池厭脩竹
寂寞既寡悰登城望原陸
遙山半吐雲巖飈時響谷
靡靡見虛煙森森視寒木
落霞乍續斷晚浪時迴復
遠矚既

濡翰徒自勞心目短歌雖可裁緣情非霧縠

往虎窟山寺

簡文帝

塵中喧慮積物外衆情捐茲地信爽瑱墟壑暖阡綿
藹藹車徒邁飄飄旌旄懸細松斜遶逕峻嶺半藏天
古樹無枝葉荒郊多野煙分花出黃鳥挂石下新泉
蒨鬱均雙樹清虛類八禪栖神紫臺上縱意白雲邊
徒然嗟小藥何由齊大年

行雨

簡文帝

本是巫山來無人覩容色唯有楚王臣曾言夢相識

賦得竹

元帝

嶰谷管新抽淇園節復修作龍還葛水為馬向并州柯
亭臨絕澗桃枝夾細流冠學芙蓉勢花堪威鳳遊
叩玉若有獻張騫應拜侯

春別應令

元帝

門前楊柳亂如絲直置佳人不自治持適言新作裂紈詩
誰悟今成織素辭

侍宴樂遊苑餞呂僧珍應詔

沈約

丹浦非樂戰負重切君臨我皇秉至德忘已用堯心
懸茲區宇內魚龍失飛沈推轂二嶠道揚旆九河陰
超乘盡三屬選士皆百金戎車出細柳餞席遵上林
命師誅後服授律緩前禽由轅方解帶嶢武稍披襟
伐罪芒山曲弔民伊水潯將陪告成禮待此未抽簪

宿東園

沈約

陳王關鷄道安仁採樵路東郊豈異昔聊可閒余步野

徑既盤紆荒阡亦交互
槿籬疎復密荆扉新且故
樹頂鳴風飈草根積霜露
驚磨去不息征鳥時相顧
茅棟嘯愁鴟平岡走寒兔
夕陰帶層阜長煙引輕素
飛光忽我適豈止歲云暮
若夢西山藥顏齡倘能度

和王中書德充詠白雲

沈約

白雲自帝鄉氤氲屢迴沒
蔽虧崑山樹含吐瑤臺月
秋風西北起飄我過城闕
城闕已參差白雲復離離
皎潔在天漢倒影入華池
將過丹丘野時至碧林垂
九重迎

飛燕萬里送翔螭

別范安成

沈約

生平少年日分手易前期及爾同衰暮非復別離時勿
言一尊酒明日難重持夢中不識路何以慰相思

春思

沈約

楊柳亂如絲綺羅不自持春草黃復綠客心傷此時青
苔已結洧碧水復盈淇日華照趙瑟風色動燕姬襟前
萬行淚故是一相思

從冠軍行建平王登廬山香鑪峰

江淹

廣成愛神鼎淮南好丹經
此山具鸞鶴往來盡仙靈
瑤草正翕絕玉樹信葱絳
氣下縈薄白雲上杳冥中坐
瞰蜿蜒俛伏視流星不尋遐
怪極則知耳目驚日落長
沙渚曾陰萬里生藉蘭素
多意臨風默含情方學松
栢隱羞逐市井名幸承光
誦末伏思託後蔭

許徵君詢自敘

江淹

張子闇內機單生蔽外象
一時排冥筌泠然空中賞
遣

此弱喪情資神任獨往採藥白雲隈聊以肆所養丹葩
曜芳蕤綠竹陰閒敞茗茗寄意勝不覺陵虛上曲櫺激
鮮飈石室有幽響去矣從所欲得失非外獎至哉操斤
客重明固已朗五難既灑落超迹絕塵網

殷東陽仲文興矚

江淹

晨遊任所萃悠悠蘊真趣雲天亦遼亮時與賞心遇青
松挺秀萼惠色出喬樹極眺清波深緬映石壁素然情
無餘滓拂衣釋塵務求仁既自我玄風豈外慕直置忘

所宰蕭散得遺慮

謝僕射混游覽

江淹

信矣勞物化憂襟未能整
薄言遵郊衢總轡出臺省
淒節序高寥寥心悟永時
菊耀巖阿雲霞冠秋嶺眷
然惜良辰徘徊踐落景卷
舒雖萬緒動復歸有靜曾
是迫桑榆歲暮從所秉丹
壑不可攀忘懷寄匠郢

陶徵君潛田居

江淹

種苗在東臯苗生滿阡陌
雖有荷鋤倦濁酒聊自適
日

暮巾柴車路闇光已夕歸人望煙火稚子候簷隙問君
亦何為百年會有役但願桑麻成蠶月得紡績素心正
如此開運望平盦

效阮公詩二首

江淹

夏后乘兩龍高會在帝臺榮光河雒出白雲蒼梧來侍
御多賢聖升降有羣才四時有變化盛明不徘徊高陽
邈已遠竚立誰語哉

其二

昔余登大梁西南望洪河時寒原野曠風急霜露多仲
冬正慘切日月少精華落葉縱橫起飛鳥時相過搔首
廣川陰懷歸思如何常願反初服閒步潁水阿

望荆山

江淹

奉義至江漢始知楚塞長南關繞桐栢西岳出魯陽寒
郊無留影秋日懸清光悲風撓重林雲霞肅川漲歲晏
君如何零淚霑衣裳玉柱空掩露金樽坐含霜一聞苦
寒奏再使艷歌傷

魏文帝曹丕遊宴

江淹

置酒坐飛閣逍遙臨華池神飈自遠至左右芙蓉披綠
竹夾清水秋蘭被幽崖月出照園中冠珮相追隨客從
南楚來為我吹參差淵魚猶伏浦聽者未云疲高丈一
何綺小儒安足為肅肅廣殿陰雀聲愁北林衆賓還城
邑何用慰我心

顏特進延之侍宴

江淹

太微凝帝宇瑤光正神縣揆日粲書史相都麗聞見列

漢構仙宮開天製寶殿桂棟留夏飈蘭橈停冬霰青林
結冥濛丹巘被葱蒨山雲備卿霽池卉具靈變重陽集
清氛下輦降玄宴驚望分衆隊矚曠盡都甸氣生川岳
陰煙滅淮海見中坐溢朱組步櫚遙瓊弁禮登佇睿情
樂闋延皇眄測恩躋愉逸公牒情浮賤榮重餽兼金巡
華過盈瑱敢飭輿人詠方慙淥水薦

雜詩

柳惲

雲輕暮色薄草綠晨芳歸山墟罷寒晦園澤潤朝暉春

心多感動睹物情復悲自君之去矣蘭堂罷鳴機徒知
遊宦是不念別離非

擣衣詩

柳惲

行役滯風波遊人淹不歸亭皋木葉下隴首秋雲飛寒
園夕鳥集思牖草蟲悲嗟矣當春服安見禦冬衣

九日侍宴樂遊苑應令

庾肩吾

輟迹光周頌巡遊盛夏功鉤陳萬騎轉閭闔九關通秋
暉逐行漏朔氣繞相風獻壽重陽節廻鑾上苑中疏山

開輦道間樹出離宮玉醴吹巖菊銀牀落井桐御梨寒
更紫仙桃秋轉紅飲羽山西射浮雲冀北驄塵飛金埒
滿葉破柳條空騰猿疑矯箭驚鴈避虛弓彫材濫杞梓
花綬接鸛鴻愧乏天庭藻徒參文雅雄

和太子重雲殿受戒

庾肩吾

皇明執東曜帝宸居北辰小乘開治道大覺極蒼旻殊
塗同義路分流合智津傳香引上德列伎進名臣連閣
翻如畫圖雲更似真鏡山含殿影梅梁落梵塵苑桂恒

留雪花不待春萬年逢瑞應千生值法身
天衣初拂石豆火欲燃薪重善終無報輕
毛庶有因

和徐主簿望月

庾肩吾

樓上徘徊月窓中愁思人照雪光偏冷
臨花色轉星流時入暈桂長欲侵輪願以
重光曲承君歌扇塵

寶劍

吳均

我有一寶劍出自昆吾溪照人如照水切
玉如切泥鏐邊霜凜凜匣上風淒淒寄語
張公子何當來見携

暮春答朱記室

何遜

游揚日色淺
騷屑風音勁
寒潭見底清
秋色極天淨
寸陰坐銷礫
千里長遼迥
桃李爾繁華
松柏余本性
故心不存此
高文徒可詠

初發新林

何遜

伊昔負薪暇
慕義遊梁楚
短翮忘連翩
追飛散容與
優游沐道教
漸漬淹寒暑
太德本無酬
輕生竊自許
舟歸屬海運
風積如鵬舉
浮水暗舟艫
合岸喧徒侶
凜凜窮

秋暮初寒入洲渚
饒吹響青江懸旗出
長嶼危檣迎不進
沓浪高難拒回首泣
親賓中天望宛許
帝城猶隱約家園無
處所去矣方悠悠含
意將何語

和蕭諮議岑離閨怨

何遜

曉河沒高棟斜月半空庭
窓中度落葉簾外隔飛螢
含悲下翠帳掩泣閉金屏
昔期今未返春草寒復青
思君無轉易何異北辰星

詠早梅

何遜

兔園標物序驚時最是梅
街霜當路發映雪擬寒開
枝橫卻月觀花繞凌風臺
朝灑長門泣夕駐臨邛杯
應知早飄落故逐上春來

臨行與故遊夜別

何遜

歷稔共追隨一旦辭羣匹
復如東注水未有西歸日
夜雨滴空堦曉燈暗離室
相悲各罷酒何時同促膝

與胡興安夜別

何遜

居人行轉軼客子暫維舟
念此一筵笑分為兩地愁
露

濕寒塘草月映清淮流方抱新離恨獨守故園秋

邊城思

何遜

柳黃未吐葉水綠半含苔春色邊城動客思故鄉來

相送

何遜

客心已百念孤遊重千里江暗雨欲來浪白風初起

相送聯句三首

何遜

寸陰常可惜別至倍傷神子瞻天際水予望路中塵

韋

憫憫岐路側去去平生親一朝事千里流涕向三春

遜

其二

昔共入門笑今成送別悲君還舊聚處為我一顰眉

王江

乘於今還促膝自此客江湄願子俱停駕看我獨解維

遜

其三

高軒雖駐軫餘日久無輝以我辭鄉淚沾君送別衣

遜

照水聯句

何遜

插花行理鬢遷延去復歸雖憐水上影復恐濕羅衣

遜

臨橋看黛色映渚媚鉛暉不顧春荷動彌畏小禽飛綺

代美女篇

蕭子範

邯鄲整輟舞巴姬請罷絃佳人淇浦出艷趙復傾燕繁
穠既為李照水亦成蓮朝酤成都酒暝數河間錢餘光
幸未惜蘭膏空自煎

入若耶溪

王籍

餘艮何汎汎空水共悠悠陰霞生遠岫陽景逐迴流蟬
噪林逾靜鳥鳴山更幽此地動歸念長年悲倦遊

北寺寅上人房望遠岫翫前池

王筠

安期遂長往交甫稱高讓遠迹入滄溟輕舉馳昆閬良
由心獨善兼且情由放豈若尋幽棲即目窮清曠激水
周堂下乚雲塞檐向閒牖聽奔濤開窓延疊嶂前階復
虛泐瀾迤成洲漲雨點散圓文風生起斜浪遊鱗互澆
瀉羣飛皆唼吭蓮葉蔓田田菱花動搖漾浮光曜庭廡
流芳襲帷帳匡坐足忘懷詎思江海上

和衛尉新渝侯巡城口號

王筠

閭闔曖已昏，鈎陳杳將暮。棲鳥城上返，晚雀林中度。屯
衛時巡警，凝威肆安步。閣道趨文昌，禁兵連武庫。銅烏
迎早風，金掌承朝露。杲恩分曉色，睥睨生秋霧。維城任
寄隆，空想靈均賦。伊余方病免，丘園保恬素。

上虞鄉亭觀濤津渚學潘安仁河陽縣詩

劉孝綽

昔余筮賓始衣冠，仕洛陽無貨徒有任。一命忝為郎，再
踐神仙側。三入崇賢旁，東朝禮髦俊。虛薄廁才良，遊談
侍名理。擗管創文章，引籍陪下膳。橫經叅上庠，誰謂服

事淺契闊變炎涼一朝謬為吏結綬去承光
鮮徒可習治民終未長化鷄仰季智馴雉
推仲康此城鄰夏穴櫛蠹茂筠篁孝碑黃
絹語神濤白鷺翔遨遊佳可望釋事上川
梁秋江凍雨絕反景照移塘纖羅殊未動
駭水忽如湯乍出連山合時如高蓋張漂
沙黃沫聚巖石素波揚榜人不敢唱舟子
詎能航離家復臨水眷然思故鄉中來不
可絕奕奕苦人腸汧汧若無阻謝病反清漳

帆渡吉陽洲

劉孝儀

揚帆乘浪華櫓鼓要風力近樹儵而遐遙山俄已逼欲
此驚龍掣將頓陽鳥翼客行悲道遠唯須前路極

詔問山中何所有賦詩以答

陶弘景

山中何所有嶺上多白雲只可自怡悅不堪持寄君

古意訓到長史漑登琅琊城

徐悱

甘泉驚烽候上谷抵樓蘭此江稱豁險茲山復鬱盤表
裏窮形勝襟帶盡巖巒修篁壯下屬危樓峻上干登陴
起遐望迴首見長安金溝朝灞滙甬道入鴛鴦鮮車驚

華轂汗馬躍銀鞍少年負壯氣耿介立衝冠懷紀燕山
石思開函谷九豈如灞上戲羞取路傍觀寄言封侯者
數奇良可歎

出塞

劉峻

薊門秋氣清飛將出長城絕漠衝風急交河夜月明
臨敵擬金鼓摧鋒揚旆旌去去無終極日暮動邊聲

新月

劉琬

仙宮雲箔捲露出玉簾鉤清光無所贈相意鳳凰樓

擬雨詩

虞騫

清風送涼氣薄暮蕩炎氛
虹照漣漪水電出嵯峨雲落
暉散長足細雨織斜文

詠美人治妝

江洪

上車畏不妍顧盼更斜轉
太恨盡眉長猶言顏色淺

春和往虎窟山寺

王臺卿

我王宗勝道駕言從所之
輶軒轉朱轂驪馬躍青絲
清渠影高蓋游樹拂行旗
賓徒紛雜皆景物共依遲
飛梁

通澗道架宇接山基叢花臨迥砌分流繞曲墀誰言非
勝境雲山獨在茲塵情良易著道性故難緇承恩奉教
義方當弘受持

陳詩

入隋侍宴應詔

後主

曰月光天德山河壯帝居太平無以報願上東封書

山齋

徐陵

桃源驚往客鶴嶠斷來賓復有風雲處蕭條無俗人山

寒微有雪石路本無塵竹徑蒙籠巧茅齋結構新燒香
披道記懸鏡厭山神砌水何年溜簷桐幾度春雲霞一
已絕寧辨漢將秦

陪衡陽王遊耆闍寺

張正胤

甘棠聽訟罷福宇試登臨兔苑移飛蓋王城列玳簪階
荒猶累玉地古尚填金龍橋丹桂偃鷺嶺白雲深秋窓
披旅葛夏戶響山禽清風吹麥壟細雨濯梅林

秋日侍宴婁苑湖應詔

江總

翠渚還鸞輅瑤池命羽觴千門響雲蹕四澤動榮光玉
軸昆池浪金舟太液張虹旗照島嶼鳳蓋繞林塘野靜
重陰闊淮秋水氣涼露開樓闕近日迴煙波長洛宴諒
斯在鎬飲詎能方朽劣叨榮遇簪笏奉周行

於長安歸還揚州九月九日行薇山亭賦韻

江總

心逐南雲逝形隨北鴈來故鄉籬下菊今日幾花開

姬人怨

江總

天寒海水慣相知空牀明月不相宜庭中芳桂憔悴葉

金匱山房詩集 卷九
井上疎桐零落枝寒燈作花羞夜短霜鴈多情恒結伴
非為隴水望秦川直置思君腸自斷

遊鍾山開善寺

徐伯陽

聊追鄴城友躡步出蘭宮法侶殊人世天花異俗中鳥
聲不測處松吟未覺風此時超愛網還復洗塵蒙

詠懷三首

張君祖

運形不標異澄懷恬無欲座可栖王侯門可迴金轂風
來詠逾清鱗萃淵不濁斯乃玄中子所以矯逸足何必

翫幽閒青衿長離俗百齡苟未遐昨辰亦非促曠騰望
舒映曩今迭相燭一世皆逆旅安悼電往速區區雖非
黨兼忘混礫玉恪神罔叢穢要在夷心曲

其二

靈飈起回浪飛雲騰逆鱗苟擢南陽秀固集三造賓緬
懷結寂夜味藻詠終晨延佇時無違誰與拂流塵眇情
寄極眇蕭條獨遨神相忘東溟裏何睎西潮津我崇道
無廢長謠想義人

其三

遙遊播荆衡杖策憇南郢
遭動逐浪迹遇靜恬夷性
拊卷從老語揮翰與莊詠
遐眺獨緬想蕭神飈塵正
時無喜惠偶絕韻將誰聽
習子茂芳標有欣徽音令
穎敷凌霜倩葩熙三春盛
拂翮期霄翔豈與桑榆競
我混不材姿遺情忘雕映
雖非嶧陽椅聊以比泗磬

贈沙門竺法願三首

張君祖

鬱鬱華陽岳絕雲抗飛峯
峭壁溜靈泉秀嶺森青松
懸

巖廓崢嶸幽谷正寥籠丹崖栖竒逸碧室禪六通泊寂
清神氣綿眇矯妙蹤止觀著無無還淨滯空空外物豈
大悲獨往非玄同不見舍利佛受屈維摩公

其二

至人如影響靈慧陶億剎應方恢權化兆類蒙慈悅冥
冥積塵昧永在巖底閉廢聰無通照遺形不洞滅明哉
如來降谿矣啟潛穴幽精淪朽壤孰若阿維察遙謝晞
玄儔何為自矜潔

其三

邈邈慶成標
峩峩浮雲巔
峻蓋十二嶽
獨秀閭浮境
丹流環方基
瑤堂臨峭頂
澗滋甘泉液
崖蔚芳芝藟
翹翹羨化倫
眇眇陵巖正
肅拱望妙覺
呼吸晞齡永
苟能夷冲心
所憇靡不淨
萬物可逍遙
何必栖形影
勉尋大乘軌
練神超勇猛

隋詩

出塞

楊素

漢虜未和親憂國不憂身握手河梁上窮涯北海濱據
鞍獨懷古慷慨感良臣歷覽多舊迹風日慘愁人荒塞
空千里孤城絕四鄰樹寒偏易古草衰恒不春交河明
月夜陰山苦霧辰鴈飛南入漢水流西咽秦風霜久行
役河朔備艱辛薄暮邊聲起空飛胡騎塵

山齋獨坐贈薛內史

楊素

巖壑澄清景景清巖壑深白雲飛暮色綠水激清音澗
戶散餘彩山窓凝宿陰花草共榮映樹石相陵臨獨坐

對陳榻無客有鳴琴寂寂幽山裏誰知無悶心

贈薛播州二首

楊素

滔滔彼江漢實為南國紀作牧求明德若人應斯美
高卧未褰帷飛聲已千里還望白雲天日暮秋風起峴山
君儻遊淚落應無已

其二

北風吹故林秋聲不可聽鴈飛窮海寒鶴唳霜華淨含
毫心未傳聞音路猶憂唯有孤城月徘徊獨臨映弔影

余自憐安知我疲病

賦昆明池一物得織女石

虞茂

隔河圖列宿清漢象昭回
支機就鯨石拂鏡取池灰
襪疑海槎渡珠似客星來
所恨雙娥斂逢秋遂不開

秋夜獨坐

袁朗

危絃斷客心虛彈落驚禽
新秋百慮淨獨夜九愁深
枯蓬唯逐吹墜葉不歸林
如何悲此曲坐作白頭吟

愛妾換馬

僧法宣

朱鬢飾金鑣紅妝束素腰似雲來蹀躞如雪去飄飄桃
花含淺汗柳葉帶餘嬌騁先將獨立雙絕不俱標

歎疆場

無名氏

聞道行人至妝梳對鏡臺淚痕猶尚在笑靨自然開

北朝詩

擣衣

溫子昇

長安城中秋夜長佳人錦石擣流黃香杵紋砧知近遠
傳聲遞響何淒涼七夕長河爛中秋明月光蠟燭塞邊

絕候鴈鴛鴦樓上望天狼

和崔侍中從駕經山寺

蕭慤

鈎陳夜警徼河漢曉參橫
游騎騰文馬前驅轉翠旌
野禽喧曙色山樹動秋聲
雲表金輪見巖端畫拱明
塔疑從地涌蓋似積香成
泉高下溜急松古上枝平
儀台多壯思麗藻蔚緣情
自嗤非照廡何以繼連城

秋思

蕭慤

清波收潦日華林鳴籟初
芙蓉露下落楊柳月中疎
燕

幃綳綺被趙帶流黃裾相思阻音息結夢感離居

關山月 王褒

關山夜月明秋色照孤城影虧同漢陣輪滿逐胡兵天
寒光轉白風多暈欲生寄言亭上吏遊客解鷄鳴

奉和同泰寺浮圖 庾信

岩岩凌太清照殿比東京長影臨雙闕高層出九城拱
積行雲礙幡搖度鳥驚鳳飛如始泊蓮合似初生輪重
對月滿鐸韻擬鸞聲畫水流全住圓雲色半輕露晚盤

猶滴珠朝火更明雖連博望苑還接銀沙城天香下桂
殿仙梵入伊笙庶聞八解樂方遣六塵情

和張侍中述懷

庾信

陽窮乃悔吝世季誠屯剥奔河絕地維折柱傾天角成
羣海水飛如雨天星落負鍾遂移山藏舟終去壑生民
忽已魚君子徒為鶴疇昔逢知己生平荷恩渥故組竟
無聞程嬰空寂寞永嘉獨流寓中原唯鼎鑊道險卧槐
樞身危累素殼漂流從木梗風卷隨秋籜張翰不歸吳

陸機猶在洛漢陽錢遂盡長安米空索時占季主龜卜
販韓康藥伏轅終入絆垂翅猶離繳徒懷琬琰心空守
黃金諾號鄒終無寄齊秦竟何託大夫唯閔周君子常
思毫寂寥共驕旅蕭條同負郭農談止穀稼野膳唯藜
藿操樂楚琴悲忘憂魯酒薄渭濱觀坐釣谷口看秋穫
唯有丘明耻無復榮期樂夷則火星流天根秋水涸冬
嚴日不煖歲晚風多朔揚浮有怪雲細交聞災電木皮
三寸厚涇泥五斗濁雖忻曲轅樹猶懼雕陵鵠生涯實

有始天道終虛橐且悅善人交無疑朋友數何時得雲雨
復見翔寥廓

寄王琳

庾信

玉關道路遠金陵信使疎獨下千行淚開君萬里書

重別周尚書二首

庾信

陽關萬里道不見一人歸唯有河邊鴈秋來南向飛

其二

河橋兩岸絕橫岐數路分山川遙不見懷袖遠相聞

金
卷九
暮秋野興賦得傾壺酒

庾信

劉伶正捉酒中散欲彈琴但使逢秋菊何須就竹林

塵鏡

庾信

明鏡如明月恒常置匣中何須照兩鬢終是一秋蓬

古今詩刪卷九

欽定四庫全書

古今詩刪卷十

明 李攀龍 編

選唐詩序

唐無五言古詩而有其古詩陳子昂以其古詩為古詩弗取也七言古詩唯杜子美不失初唐氣格而縱橫有之太白縱橫往往彊弩之末間雜長語英雄欺人耳至如五七言絕句實唐三百年一人蓋以不用

意得之即太白亦不自知其所至而工者顧失焉五
言律排律諸家槩多佳句七言律體諸家所難王維
李頎頗臻其妙即子美篇什雖衆憤焉自放矣作者
自苦亦惟天實生才不盡後之君子本茲集以盡唐
詩而唐詩盡於此李攀龍撰

唐五言古詩

飲馬長城窟行

太宗皇帝

塞外悲風切交河冰已結瀚海百重波陰山千里雪迢

戍危烽火層巒引高節悠悠卷旆旌飲馬出長城塞沙
連騎跡朔吹斷邊聲胡塵清玉塞羌笛韻金鉦絕漠千
戈戢車徒振原隰都尉反龍堆將軍旋馬邑揚麾氛霧
靜紀石功名立荒裔一戎衣雲臺凱歌入

述懷

魏徵

中原還逐鹿投筆事戎軒縱橫計不就慷慨志猶存策
杖謁天子驅馬出關門請纓繫南越憑軾下東藩鬱紆
陟高岫出沒望平原古木鳴寒鳥空山啼夜猿旣傷千

里目還驚九折魂，豈不憚艱難。深懷國士恩，季布無二諾。侯嬴重一言，人生感意氣。功名誰復論。

初到陸渾山莊

宋之問

授衣感窮節，策馬凌伊闕。歸齊逸人趣，日覺秋琴閒。寒露哀北阜，夕陽破東山。浩歌步岑樾，栖鳥隨我還。

感遇二首

張九齡

蘭葉春葳蕤，桂花秋皎潔。欣欣此生意，自以為佳節。誰知林栖者，聞風坐見悅。草木有本心，何求美人折。

其二

孤鴻海上來池潢不敢顧側見雙翠鳥巢在三珠樹矯
矯珍木嶺得無金丸懼美服患人指高明逼神惡今我
游冥冥弋者何所慕

薊丘覽古贈盧居士藏用六首

并序

陳子昂

丁酉歲余北征出自薊門歷觀燕之舊都其
城池霸迹已蕪沒矣慨然憶樂生鄒子羣賢
之游因登薊樓作六詩以志之寄終南盧居士

金史卷之八
卷十
北登薊丘望求古軒轅臺應龍已不見牧馬生黃埃尚
想廣成子遺跡白雲隈

右軒轅臺

南登碣石館遙望黃金臺丘陵盡喬木昭王安在哉霸
圖悵已矣驅馬復歸來

右燕昭王

王道已淪昧戰國競貪兵樂生何感激仗義下齊城雄
圖竟中失遺嘆寄阿衡

右樂生

秦王曰無道太子怨亦深一聞田光義匕首贈千金其
事雖不立千載為傷心

右燕太子

自古皆有死殉義良獨希奈何燕太子尚使田公疑伏
劍誠已矣感我涕沾衣

右田光先生

大運淪三代天人罕有窺鄒子何遼廓謾說九瀛垂興

亡已千載今也則無誰

右鄒子

訓暉上人夏日林泉

聞道白雲居窈窕青蓮宇巖泉萬丈流樹石千年古林
臥對軒窗山陰滿庭戶方釋塵事勞從君襲蘭杜

子夜吳歌

李白

長安一片月萬戶擣衣聲秋風吹不盡總是玉關情何
日平胡虜良人罷遠征

妾薄命

李白

漢帝寵阿嬌貯之黃金屋
咳唾落九天隨風生珠玉
寵極愛還歇妬深情却疎長門一步地
不肯暫迴車雨落不上天水覆難再收
君情與妾意各自東西流昔日芙蓉花
今成斷根草以色事他人能得幾時好

贈盧司戶

李白

秋色無遠近出門盡寒山
白雲遙相識待我蒼梧間
借問盧耽鶴西飛幾處還

送張舍人之江東

李白

張翰江東去正值秋風時天清一鴈遠海濶孤帆遲白
日行欲暮滄波杳難期吳洲如見月千里幸相思

魯郡東石門送杜二甫

李白

醉別復幾日登臨徧池臺何時石門路重有金樽開秋
波落泗水海色明徂徠飛蓬各自遠且盡手中杯

送楊山人歸嵩山

李白

我有萬古宅嵩陽玉女峯長留一片月掛在東溪松爾

去擬仙草菖蒲花紫茸歲晚或相訪青天騎白龍

懷蘇武

李白

蘇武在匈奴十年持漢節白鴈上林飛空傳一書札收
羊邊地苦落日歸心絕渴飲月窟冰飢餐天上雪東還
沙塞遠北愴河梁別泣把李陵衣相看淚成血

經下邳圯橋懷張子房

李白

子房未虎嘯破產不為家滄海得壯士椎秦博浪沙報
韓雖不成天地皆振動潛匿游下邳豈曰非智勇我來

圮橋上懷古欽英風唯見碧流水曾無黃石公嘆息此
人去蕭條徐泗空

望鸚鵡洲懷禰衡

李白

魏帝營八極蟻視一禰衡黃祖斗筭人殺之受惡
名吳江賦鸚鵡落筆超羣英鏘鏘振金玉句句欲
飛鳴鵲鵲啄孤鳳十春傷我情五嶽起方寸隱然
詎可平才高竟何施寡識冒天刑至今芳洲上蘭
蕙不忍生

前出塞八首

杜甫

戚戚去故里悠悠赴交河
公家有程期亡命嬰禍羅
君已富土境開邊一何多
棄絕父母恩吞聲行負戈

其二

磨刀鳴咽水水赤亦傷手
欲輕斷腸聲心緒亂已久
丈夫誓許國憤惋復何有
功名圖麒麟戰骨當速朽

其三

送徒既有長遠戍亦有身
生死向前去不勞吏怒嗔
路

逢相識人附書與六親哀哉兩決絕不復同苦辛

其四

迢迢萬餘里領我赴三軍軍中異苦樂主將寧盡聞隔河見胡騎倏忽數百羣我始為奴僕幾時樹功勲

其五

挽弓當挽強用箭當用長射人先射馬擒賊先擒王殺人亦有限立國自有疆苟能制侵凌豈在多殺傷

其六

驅馬天雨雪軍行入高山徑危抱寒石指落層冰間已
去漢月遠何時築城還浮雲暮南征可望不可攀

其七

單于寇我壘百里風塵昏雄劍四五動彼軍為我奔虜
其名王歸繫頸授轅門潛身備行列一勝何足論

其八

從軍十年餘能無分寸功衆人貴苟得欲語羞雷同中
原有鬪爭況在狄與戎丈夫四方志安可辭固窮

後出塞

杜甫

朝進東門營暮上河陽橋
落日照大旗馬鳴風蕭蕭
平沙列萬幕部伍各見招
中天懸明月令嚴夜寂寥
悲笳數聲動壯士慘不驕
借問大將誰恐是霍嫖姚

法鏡寺

杜甫

身危適他州勉強終勞苦
神傷山行深愁破岷寺古
嬋娟碧蘚淨蕭瑟寒籜聚
洄洄山根水冉冉松上雨
洩雲蒙清晨初日已復吐
朱甍半光烟戶牖粲可數
拄策忘

前期出蘿已亭午冥冥子規叫微徑不復取

萬丈潭

杜甫

青溪合冥冥神物有顯晦龍衣積水蟠窟壓萬丈內跼
步凌垠堦側身下烟靄前臨洪濤寬却立蒼石大山危
一徑盡岸絕兩壁對削成根虛無倒影垂澹瀨黑知灣
潭底清見光炯碎孤雲倒來深飛鳥不在外高蘿成帷
幄寒水疊旌旆遠川曲通流嵌竇潛洩瀨造幽無人境
發興自我輩告歸遺恨多將老斯遊最閉藏修鱗蟄出

金石錄卷十
卷十
八巨石礙何當炎天過快意風雲會

石櫃閣

杜甫

季冬日已長山晚半天赤蜀道多草花江間饒奇石
石櫃層波上臨虛蕩高壁清暉迴羣鷗暝色帶遠客
羈栖負幽意感嘆向絕跡信甘孱懦嬰不獨凍餒迫
優游謝康樂放浪陶彭澤吾哀未自由謝爾性有適

玉華宮

杜甫

溪回松風長蒼鼠竄古瓦不知何王殿遺構絕壁下陰

房鬼火青壤道哀湍瀉萬籟真笙竽秋色正瀟灑美人
為黃土況乃粉黛假當時侍金輿故物獨石馬憂來藉
草坐浩歌淚盈把冉冉征途間誰是長年者

夢李白二首

杜甫

死別已吞聲生別常惻惻江南瘴癘地逐客無消息故
人入我夢明我長相憶恐非平生魂路遠不可測魂來
楓林青魂返關塞黑君今在羅網何以有羽翼落月在
屋梁猶疑照顏色水深波浪濶無使蛟龍得

其二

浮雲終日行游子久不至三夜頻夢君情親見君意告
歸常局促苦道來不易江湖多風波舟楫恐失墜出門
搔白首苦負平生志冠蓋滿京華斯人獨憔悴孰云網
恢恢將老身反累千秋萬歲名寂寞身後事

晦日尋崔戢李封

杜甫

朝光入甕牖尸寢驚敝裘起行視天宇春氣漸和柔興
來不暇懶今晨梳我頭出門無所待徒步覺自由杖藜

復恣意免值公與侯晚定崔李交會心真罕儔每過得
酒傾二宅可淹留喜結仁里歡況因令節求李生園欲
荒舊竹頗修修引客看掃除隨時成獻酬崔侯初筵色
已畏空樽愁未知天下士至性有此不草芽旣青出蜂
聲亦暖游思見農器陳何當甲兵休上古葛天氏不貽
黃屋憂至今阮籍等熟醉為身謀威鳳高其翔長鯨吞
九州地軸為之翻百川皆亂流當歌欲一放淚下恐莫
收濁醪有妙理庶用慰沈浮

雨 杜甫

峽雲行清曉，烟霧相徘徊。
風吹滄江去，雨灑石壁來。
淒淒生餘寒，殷殷兼出雷。
白谷變氣候，朱炎安在哉。
高鳥濕不下，居人門未開。
楚宮久已滅，幽珮為誰哀。
侍臣書王夢，賦有冠古才。
冥冥翠龍駕，多自巫山臺。

晚泊潯陽望香爐峯 孟浩然

挂席幾千里，名山都未逢。
泊舟潯陽岸，始見香爐峯。
嘗讀遠公傳，永懷塵外踪。
東林精舍近，日暮空聞鐘。

西施詠 王維

艷色天下重西施寧久微
朝為越溪女莫作吳王姬
賤日豈殊衆貴來方悟稀
邀人傳脂粉不自著羅衣
君寵益嬌態君憐無是非
當時浣紗伴莫得同車歸
持謝隣家子效顰安可希

送別 王維

下馬飲君酒問君何所之
君言不得意歸臥南山陲
但去莫復問白雲無盡時

齊州送祖三

王維

相逢方一笑相送還成泣
祖帳已傷離荒城復愁入
天寒遠山淨日暮長河急
解纜君已遙望君猶佇立

奉寄韋太守陟

王維

荒城自蕭索萬里山河空
天高秋日迥嘹唳聞歸鴻
寒塘映衰草高館落桐臨
此歲方晏顧景問悲翁故
人不可見寂寞平林東

過李揖宅

王維

閉門秋草色終日無車馬客來深巷中犬吠寒籬下散
髮時未簪道書行尚把與我同心人樂道安貧者一罷
宜城酌還歸洛陽社

崔濮陽兄季重前山興

王維

秋色有佳興況君池上門悠悠西林下自識門前山千
里橫黛色數峯出雲間嵯峨我對秦國合沓藏荆關殘雨
斜日照夕嵐飛鳥還故人今尚爾嘆息此顏顏

藍田石門精舍

王維

落日山水好漾舟信歸風玩奇不覺遠因以緣源窮遙
愛雲木秀初疑路不同安知清流轉偶與前山通捨舟
理輕策果然愜所適老僧四五人逍遙蔭松柏朝梵林
未曙夜禪山更寂道心及牧童世事問樵客瞑宿長林
下焚香臥瑤席澗芳襲人衣山月映石壁再尋畏迷誤
明發更登歷笑謝桃源人花紅復來覲

塞上曲三首

王昌齡

蟬鳴桑樹間八月蕭關道出塞入塞寒處處黃蘆草從

來幽并客皆共沙塵老莫學游俠兒矜誇紫騮好

其二

飲馬渡秋水水寒風似刀平沙日未沒黯黯見臨洮昔
日長城戰咸言意氣高黃塵是今古白骨亂蓬蒿

其三

秋風夜渡河吹卻鴈門桑遙見胡地獵韞馬宿嚴霜五
道分兵去孤軍百戰場功多翻下獄士卒但心傷

江上聞笛

王昌齡

橫笛怨江月扁舟何處尋聲長楚山外曲繞胡關深相
去萬餘里遙傳此夜心寥寥浦寂寒響盡唯空林不知
誰家子復奏耶郢音水客皆擁棹空霜遂盈襟羸馬望
北走遷人悲越吟何當邊草白旌節隴城陰

鄭縣宿陶大公館贈馮六元二

王昌齡

儒有輕王侯脫略當世務本家藍田中非為漁弋故無
何困躬耕且欲馳永路幽居與君近出谷同所驚昨日
辭石門五年變秋露雲龍未相感干謁亦已屢子為黃

綬羈余忝蓬山顧京門望西岳百里見郊樹飛雨祠上
來靄然關中暮驅車鄭城宿秉燭論往素山月出華陰
開此河渚霧清光比故人豁達展心晤馮公尚戢翼元
子仍跼步拂衣易為高論跡難有趣張范善始終吾等
豈不慕罷酒當涼風屈伸備冥數

述華清宮

儲光義

上林神君宮此地即明庭山開鴻濛色天轉招搖星三
雪報大有孰謂非我靈

田家雜興八首 儲光義

春至鵲鷦鳴薄言向田墅不能自力作黽勉娶隣女既
念生子孫方思廣田園閒時相顧笑喜悅好禾黍夜夜
登嘯臺南望洞庭渚百草被霜露秋山響砧杵却羨故
年時中情無所取

其二

衆人恥貧賤相與尚膏腴我情既浩蕩所樂在畋漁山
澤時晦冥歸家暫閒居滿園種葵藿繞屋樹桑榆禽雀

知我閒翔集依我廬所願在優游州縣莫相呼日與南山老兀然傾一壺

其三

逍遙阡陌上遠近無相識落日照秋山千岩同一色網罟繞深莽鷹鷂始輕翼獵馬旣如風奔獸莫敢息駐旗滄海上犒士吳宮側楚國有夫人性情本貞直鮮禽徒自致終歲竟不食

其四

田家趨壠畝當晝掩虛關隣里無烟火兒童共幽閒桔
槔懸空圓雞犬滿桑間時來農事隙採藥游名山但言
所採多不念路險艱人生如蜉蝣一往不可攀君看西
王母千載笑容顏

其五

貧士養性情不復知憂樂去家行賣畚留滯南陽郭秋
至黍苗黃無人可刈獲孺子朝未飯把竿逐鳥雀忽見
梁將軍乘車出宛洛意氣軼道路光輝滿墟落安知負

薪者啞啞笑輕薄

其六

楚山有高士梁國有遺老築室既相隣同田復同道糗
糒常共飯兒孫每更抱忘此耕耨勞愧彼風雨好螻蛄
鳴空澤鷓鴣傷秋草日夕寒風來衣裳苦不早

其七

梧桐蔭我門薜荔網我屋超超兩夫婦朝出暮還宿稼
穡既自種牛羊還自牧日旰懶耕鋤登高望川陸空山

足禽獸墟落多喬木白馬誰家兒聯翩相馳逐

其八

種桑百餘樹種黍三十畝衣食既有餘時時會賓友夏
來菰米飯秋至菊花酒孺人喜逢迎穉子解趨走日暮
後園裏團團蔭榆柳酩酊乘夜歸涼風吹戶牖清淺望
河漢低昂看北斗數甕猶未開明朝能飲否

古今詩刪卷十